

諸  
史  
考  
異

諸史考異卷十五

臨海洪頤煊撰

南史上

西陵太守

宋武帝本紀以西陵太守朱齡石爲益州刺史頤煊案宋書本紀朱齡石傳俱作西陽太守州郡志西陽太守屬郢州西陵縣名屬西陽太守

北東海

元興元年正月進公爵爲王以徐州之海陵北東海北譙北梁頤煊案宋書本紀東海上無北字州郡志南徐州治南東海此稱徐州卽北徐州治彭城東海上不應加北字

王球

文帝本紀元嘉十七年十二月癸亥以光祿大夫王球爲尙書僕射十八年十一月戊子尙書僕射王球卒頤煊案宋書本紀皆作王琳宋書有王球傳而無王琳是傳寫譌也

徐道寶

孝武本紀孝建元年二月兗州刺史徐道寶舉兵反頤煊案南郡王義宣傳宋書本紀俱作徐遺寶

鯁鯁

明帝本紀以蜜漬鯁鯁一食數升奢費過度頤煊案南齊書虞愿傳帝素能食尤好逐夷以銀鉢盛蜜漬之一食數鉢謂揚州刺史王景文曰此是奇味卿頗足不景文曰臣夙好此物貧素

致之甚難可想見其珍貴

### 劉彥節

齊高帝本紀與袁粲褚彥回劉彥節等更日入直決事號爲四賢  
頤煊案宋書袁粲傳時粲與齊王褚淵劉秉入直平決萬機時謂之四貴  
秉字彥節見宗室長沙景王傳史臣避唐嫌名諱因舉其字

### 配享太祖廟庭

武帝本紀永明十年正月丙戌詔故太宰褚彥回故太尉王儉故司空柳世隆驃騎大將軍王敬則鎮軍大將軍陳顯達故鎮東將軍李安人配享太祖廟庭頤煊案王敬則陳顯達此時尙存後二人以反罪伏誅配享廟庭徒成虛語南齊書禮志於二

人結銜上誤添故字錢氏已駁其失不知此紀之尙未誤也

### 楊婆兒

鬱林王本紀在西州令女巫楊氏禱祀速求天位及文惠薨謂由楊氏之力倍加敬信呼楊婆宋氏以來人間有楊婆兒哥蓋此徵也頤煊案袁彖傳于時何澗爲文惠太子作楊畔歌辭甚側麗太子甚悅隋書音樂志其歌曲有陽伴後呼爲楊叛兒皆此曲一聲之轉

### 王偃子

東昏侯本紀遣王寶孫督戰呼爲王偃子頤煊案梁書武帝紀闕人王偃子持白虎幡督率諸軍南齊書本紀作遣左右直長闕豎王寶孫督戰呼爲王長子

謚曰懿

梁武帝本紀皇考歷位侍中衛尉太子詹事領軍將軍丹陽尹  
贈鎮北將軍謚曰懿頤煊案梁書本紀無謚曰懿三字

大明八年

帝以宋孝武大明元年歲次甲辰生于秣陵縣同夏里三橋宅  
頤煊案當依梁書本紀作大明八年

王天虎

乃遣參軍王天武龐慶國詣江陵頤煊案梁書本紀作王天獸  
皆避唐諱虎字改書內凡白虎幡虎賁虎牢虎檻虎魄虎豹諸  
虎字皆不避唯人名犯者則改蓋其例如此其間有與例不合  
者皆後人所改

臨川王宏

天監十二年九月加揚州刺史臨川王宏位司空十七年六月乙酉中軍將軍中書監臨川王宏以本號行司徒頤煊案梁書本紀十七年五月戊寅驃騎大將軍揚州刺史臨川王宏免辛巳以臨川王宏爲中軍將軍中書監此刪戊寅辛巳兩節前後官位遂不合

土州

太清元年三月甲辰遣司州刺史羊鴉仁率土州刺史桓和仁州刺史湛海珍等應接侯景頤煊案隋書地理志漢東郡土山縣梁曰龍巢置土州梁書羊鴉仁傳作土州因字形相近而譌武帝本紀作兗州誤

京師

二年三月己未屈獠洞斬李賁傳首建鄴頤煊案梁書本紀作傳首京師簡文本紀大寶二年七月景還至建鄴梁書本紀作侯景還至京師李延壽撰南北史每內北而外南故不以梁都爲京師如此類甚多

東方光

元帝本紀承聖二年十二月宿豫土人東方光據城歸北齊江  
西州郡皆起兵應之頤煊案梁書本紀作宿預土民東方光歸  
化魏江西州郡皆起兵應之二年正月陳霸先遣晉陵太守杜  
僧明率眾助東方光北齊書文宣紀天保四年不載此事則作  
歸梁者是也



言身考異卷十五  
孝閔帝

陳武帝本紀永定元年是歲周閔帝元年及九月冢宰宇文護廢閔帝而奉明帝頤煊案周書本紀皆作孝閔帝

太后

宋少帝司馬皇后傳頤煊案宋書本傳作少帝司馬皇太妃延壽於諸后未立爲皇后由所生尊崇者則稱太后如宋書武帝胡婕妤史稱文帝胡太后文帝路淑妃史稱孝武昭路太后文帝沈婕妤史稱明宣沈太后是也少帝司馬皇后宋初拜皇太子妃少帝卽位立爲皇后前廢帝何皇后孝建三年納爲皇妃大明五年薨於東宮廢帝卽位追崇曰獻皇后故皆稱皇后宋書稱少帝司馬皇太妃非也

南郡王

齊鬱林王何妃傳南郡王所與無賴人游頤煇案傳中南郡王  
凡三見是時鬱林雖未卽位不當稱其舊封此亦史之駁文未  
改正者

徐妃

梁元帝徐妃傳帝製金樓子述其淫行頤煇案今世所傳金樓  
子六卷無言徐妃事

子懷珍嗣

宋長沙景王傳義宗卒於南兗州刺史謚曰惠侯子懷珍嗣頤  
煇案宋書本傳作子懷侯玠嗣珍玠字形相近

海西

臨川烈武王傳劉遵字慧明淮南海西人頤煊案宋書本傳作  
臨淮海西人州郡志海西屬臨淮郡當是其先屬淮南也

鮑照

鮑照字明遠東海人頤煊案杜甫詩才兼鮑昭愁絕倒韋莊詩  
欲將張翰松江雨畫作屏風寄鮑昭唐人避武后諱改作昭

錄尙書

江夏王義恭傳徵義恭爲司徒錄尙書事義恭小心且戒義康  
之失雖爲總錄奉行文書而已頤煊案彭城王義康傳義康既  
專朝權事決自己生殺大事皆以錄命斷之

改刀爲力

元凶劭傳初命之曰劭在文爲召刀後惡焉改刀爲力頤煊案

說文劬勉也从力召聲讀若舜樂韶字在力部此必俗體有作  
劬者而南史妄爲之說

### 廬陵王

廬陵王禕傳字休秀文帝第八子也元嘉二十二年封東海王  
明帝踐阼封廬陵王頤煊案宋書本傳作廬江王

### 安陰縣公

晉熙王昶傳乃以第六皇子燮繼昶封爲晉熙王齊受禪燮降  
封安陰縣公謀反賜死頤煊案宋書本傳作降封隆安縣侯食  
邑千五百戶謀反賜死

### 武寧太守

王玄謨傳謝晦爲荊州請爲南蠻行參軍武寧太守頤煊案宋

書本傳作武昌太守州郡志武監郡屬荊州武昌郡屬鄆州孝  
建以前屬江州

冀州刺史

元凶弒立以玄謨爲冀州刺史頤煊案宋書作益州刺史下文  
孝武伐逆玄謨遣濟南太守垣護之等將兵赴義則作冀州是  
服領

蕭惠開傳今以惠開爲憲司冀當稱職但一往限額已白殊有  
所震頤煊案宋書本傳眼額作服領

偏諱

蕭琛傳帝每朝讌接琛以舊恩嘗犯武帝偏諱帝歛容琛從容  
曰名不偏諱陛下不應諱願上曰各有家風頤煊案六朝凡言

諱者皆其父名此犯武帝父順之偏諱

謝宣明

謝晦傳以晦領南蠻校尉荊州刺史加都督精兵舊將悉以配之頤煊案劉瑀傳與顏竣書曰朱修之三世叛兵一日居荊州青油幕下作謝宣明面見向使齋帥以長刀引吾下席可想見其威嚴

字通遠

謝瞻傳字宣遠一曰名檐字通遠頤煊案謝密傳道遠懷清悟采采標蘭訊是舉其舊字

從叔混

瞻文章之美與從叔琨族弟靈運相抗頤煊案宋書本傳琨作

混晉書謝安傳混爲安孫瞻爲安兄萬曾孫靈運爲玄孫玄少  
穎悟與從兄朗俱爲叔父安所知故瞻以混爲從叔靈運爲族  
弟也

瑗生靈運

謝靈運傳祖玄父瑗生而不慧玄謂親知曰我乃生瑗瑗兒何  
爲不及我顧煊案宋書本傳作我乃生瑗瑗那得生靈運晉書  
謝玄傳我尙生瑗瑗那得不生靈運三傳文異當以宋書之言  
爲正

聞諱徒跣

謝超宗傳父鳳衛將軍劉道隆正觸其父名曰旦侍宴至尊說  
君有鳳毛超宗徒跣還內函煊案王亮傳父攸沈疇之云未知

明府諱若爲攸字當作無散尊傍犬爲犬傍無散尊若是有心攸無心攸亮不履下牀跣而走蓋六朝人重避諱其禮如此

越嶠

謝幾卿傳超宗徙越嶠詔家人不得相隨頤煊案梁書本傳作超宗坐事徙越州

南奔

梁天監中自尙書三公郎爲書侍御史舊郎官轉爲此職者世謂之南奔頤煊案宋書百官志漢東京御史中丞遇尙書丞則中丞止車執版揖而丞郎坐車舉手禮之而已南齊書王僧虔傳遷御史中丞領驍騎將軍甲族向來多不居憲臺故世以此爲左遷



言身者吳卷十一  
散騎侍郎

謝密傳晉世名家身有國封者起家多拜員外散騎侍郎頤煊案謝靈運傳襲封康樂公以國公例除員外散騎侍郎不就王弘傳子錫嗣少以宰相子起家爲員外散騎亦以有國封也

東鄉君遺財

及東鄉君薨遺財千萬園宅十餘所又會稽吳興琅邪諸處太傅安司空珍時事業奴僮猶數百人頤煊案上文稱混仍世宰相一門兩封田業十餘處僮役千人此爲重出

雙聲疊韻

謝莊傳王玄謨問莊何者爲雙聲何者爲疊韻答曰元護爲雙聲礮礪爲疊韻頤煊案宋重修廣韻卷未有雙聲疊韻法章灼

良略是雙聲灼略章良是疊韻章掌良兩是雙聲掌兩章良是疊韻卽本於此

新歲三十五

亡高祖四十曾祖三十三亡祖四十七下官新歲便四十五頤煊案宋書本傳作新歲便三十五莊以泰始二年卒年四十六此與江表王義恭牋在孝建二年則作四十五者誤也莊高祖謝萬晉書萬卒時年四十二此作四十亦誤

唯宜飲酒

謝朓傳仍爲吳興太守弟瀹時爲吏部尙書朓至郡致瀹數斛酒還書曰可力飲此勿豫人事頤煊案謝瀹傳初朓爲吳興瀹於征虜潛送別酒指瀹口曰此中唯宜飲酒文意相同

珣字音

王宏傳容有疑其諱者宏曰家諱與蘇子高同頤煊案宏父名珣客疑其所讀音陸德明爾雅釋文珣胥均反又音峻說文云周書所謂夷玉讀若宣宏言與蘇子高同則是讀音峻也

路瓊之

王僧達傳路瓊之太后兄慶之孫也宅與僧達門並頤煊案路太后傳太后弟子撫軍參軍瓊之上表自陳有司承旨奏贈瓊之父道慶給事中此作太后兄慶之孫疑誤

駟駟牧馬

王融傳駟駟之牧遂不能嗣頤煊案毛詩駟駟牡馬釋文牡本作牧顏氏家訓書證篇駟駟牡馬江南書皆作牝牡之牡河北

本悉爲放牧之牧此同河北本

大宗不衰

王瞻傳從父僧遠聞而異之謂其父猷曰大宗不衰寄之此子  
頤煊案梁書本傳作從父尙書僕射僧達謂瞻父曰吾宗不衰  
寄之此子遠字譎

養炬

王泰傳沈約常曰王有養炬謝有覽舉養泰小字炬筠小字也  
頤煊案梁書王筠傳時人爲之語曰謝有覽舉王有養炬炬是  
泰養卽筠並小字也與此異

殷鈞

王筠傳昭明太子愛文學士常與筠及劉孝綽陸倕到洽殷鈞

等遊宴玄圃筠又與殷鈞以方雅見禮頤煊案梁書本傳作殷  
芸劉孝綽傳亦作陳郡殷芸殷鈞殷芸梁書各有傳

稱小字

王彧傳上手詔譬之曰庶姓作揚州徐干木王休元殷鐵並處  
之不辭頤煊案王宏傳字休元蔡廓傳我不能爲徐干木署紙  
尾范泰傳君生平重殷鐵今以此爲報干木徐羨之小字鐵殷  
景仁小字也

王綸之

王綸之傳字元章齊永明中歷位侍中頤煊案南齊書作倫之  
附見其父延之傳

坐璽制免

王韶之傳坐璽制謬誤免黃門事在謝晦傳頤煊案謝晦傳永  
初二年坐行璽封鎮西司馬南郡太守王華而誤封北海太守  
球板免晦侍中不言韶之同免

諸史考異卷十五終

南海潘乃成初校番禺黃濟夏校

諸史考異卷十六

臨海洪頤煊撰

南史下

避諱稱下官

垣榮祖傳除榮祖宄從僕射遣還徐州說刺史薛安都曰天之  
所廢誰能興之使君今不同八百諸侯如下官所見非計中也  
頤煊案南齊書本傳作今不同八百諸侯如民所見榮祖下邳  
人於徐州刺史例稱民南史避唐諱改作下官餘見到摛傳錢  
氏考異

襄陽星惡

袁顛傳顛舅蔡興宗謂曰襄陽至惡豈可冒邪頤煊案宋書本

傳作襄陽星惡下文云天道遠遠何必皆驗字當作星

孔奐

孔琇之傳子臻至太子舍人尙書三公郎臻子幼孫梁寧遠枝江公主簿無錫令幼孫子奐頤煊案陳書孔奐傳曾祖琇之祖珩太子舍人尙書三公郎父稚孫梁寧遠枝江公主簿無錫令

期頤

褚炤傳彥回拜司徒炤歎曰名德不昌遂有期頤之壽頤煊案彥回傳彥年四十八不得云期頤之壽

殷恆

蔡興宗傳太子率殷恆爲中庶子頤煊案下文殷恆凡三見宋書本傳皆作殷常



新昌太守

於是除興宗永昌太守郡屬交州頤煊案宋書本傳作新昌太守州郡志新昌郡宋末立屬交州刺史而無永昌

袴

何點傳永元中崔惠景圍城乃逼召點點裂裙爲袴往赴其軍頤煊案劉穆之傳及武帝克京城穆之反室壞布裳爲袴往見帝方言袴齊魯之間謂之襜或謂之襜關西謂之袴今世有襜袴之稱蓋軍中兵士所服

張齊

張穆傳帝時亦酣謂曰卿兄殺郡守弟殺其君如君兄弟有何名稱頤煊案兄謂張瓌弟謂張齊梁書張齊傳馮翊郡人或云

橫桑人也初事桓歷生歷生罷官歸吳郡張穆穆甚相知重以爲心腹雖家細事皆以任焉齊非穆弟或當時冒稱弟耳

張禕

張暢傳邵兄禕子也頤焯案宋書本傳作邵兄偉之子南齊書張融傳亦作祖禕晉琅邪王國郎中令

宋略

裴子野傳及齊永明末沈約撰宋書稱松之已後無聞焉子野更撰爲宋略二十卷其敘事多善而云彘淮南太守沈璞以其不從義師故也約懼徒跣謝之請兩釋焉頤焯案梁書裴子野傳無此兩端蓋由兩釋後削之

白渦書

周捨傳南津校尉郭祖深獲始興相白渦書餉捨衣履及婢以  
閒坐免官頤煊案梁書本傳作獲武陵太守白渦書許遺捨面  
錢百萬

合族避諱

周弘正傳弘正諂附王偉又與周石珍合族避景諱改姓姬氏  
頤煊案梁書侯景傳景曰前世吾不復憶惟阿爺名標景黨有  
知景祖名周者於是追尊其祖周爲大丞相父標爲元皇帝

北侵

柳元景傳及朝廷大舉北侵頤煊案宋書本傳作及朝廷大舉  
北討梁書裴子野傳普通七年王師北伐南史作大舉北侵此  
皆內北外南之證

卒年不同

柳惔傳尋遷尙書左僕射年六十卒于湘州刺史頤煊案梁書本傳六年十月卒于州時年六十四

反語臨讎

劉悛傳悛本名忱宋明帝多忌反語劉忱爲臨讎改名悛焉頤煊案說文忱从心宥聲後漢書竇武傳太后宥豫未忍宥豫卽猶豫足證忱字反語爲臨讎也

沈僧叟

劉孝綽傳領軍臧盾太府卿沈僧叟等並被時遇孝綽尤輕之頤煊案梁書本傳作太府卿沈僧臬

東西一百

齊豫章王疑傳百年復何可得止得東西一百於事亦濟頤煊案隋書食貨志梁自破嶺以東八十爲百名曰東錢江郢已上七十爲百名曰西錢

永福省

竟陵王昭胄傳明帝慮有同異召諸王侯入宮晉安王寶義及江陵公寶覽住中書省高武諸孫住西省其夜並將加害頤煊案南康縣侯子恪傳始安王遙光勸上併誅高武諸子孫於是並敕竟陵王昭胄等六十餘人入永福省期三更當殺之西省卽永福省也

于瑤之

晉安王子懋傳阮報同產弟子瑤之爲計頤煊案南齊書本傳

作阮報其兄于瑤之爲計

寶寅奔魏

鄱陽王寶寅傳中興二年謀反奔魏頤煊案和帝本紀中興二年三月辛丑鄱陽王寶寅奔魏南齊書本傳作中興二年謀反誅誤

彭城侯

陳顯達傳齊高帝討桂陽賊於新亭壘事平封彭城侯頤煊案南齊書本傳封豐城縣侯邑千戶

晉興縣男

周山圖傳建元元年封晉興縣男頤煊案南齊書本傳封廣晉縣男邑三百戶

堯廟蘇侯神

崔祖思傳年十八爲都昌令隨青州刺史坦護之入堯廟廟有蘇侯神偶坐護之曰唐堯聖人而與蘇侯神共坐今欲正之何如祖思曰使君若清蕩此坐則是堯廟重去四凶頤煊案南齊書本傳作初辟主簿與刺史劉懷珍於堯廟祀神廟有蘇侯像懷珍云云與此不同

鮮于琮

陸襄傳先是郡人鮮于琮服食修道法頤煊案梁書本傳作鮮于琮

中從事

劉善明傳年四十刺史劉道隆辟爲中從事頤煊案南齊書本

傳作辟爲治中從事明僧紹傳祖玕州中從事南齊書作州治  
中梁吳平侯景傳祖道賜仕宋終于書侍御史梁書作治書侍  
御史皆避高宗名闕

孔徹

劉瓚傳與友人會稽孔邊同舟入東於塘上遇一女子或曰與  
友孔徹同舟入東頤煊案南齊書本傳作與友人孔徹同舟入  
東

蕭淵藻

梁西昌侯藻傳頤煊案梁書鄧元起傳徵爲右衛將軍以西昌  
蕭深藻代之藻本名淵藻唐人避諱改作深或闕淵字但稱蕭  
藻



蕭淵明

貞陽侯明傳頤煊案陳書武帝紀四年五月齊送貞陽侯淵明還主社稷梁書敬帝紀齊送貞陽侯蕭深明來主梁嗣亦唐人因避諱闕淵字

爹

始興王憺傳人歌曰始興王人之爹徒我反赴人急如水火何時

復來哺乳我荆土方言謂父爲爹頤煊案玉篇爹屠可切父也又陟斜切今人則讀如後音

吳郡浙江

昭明太子統傳吳郡屢以水災不熟有上言當漕大瀆以瀉浙江頤煊案漢書地理志會稽郡吳縣南江在南東入海浙江卽

南江梁書本傳作吳興郡上言傳寫衍興字

通理弟又理

南康王會理傳會理弟通理字仲宣位太子洗馬封祈陽侯至是亦遇害通理弟又理字季英生十旬而簡王薨頤煊案梁書南康王傳會理與建安侯通理並遇害通理字季英會理第六弟也無又理名史卽以又理傳爲通理其誤甚矣

南陽縣男

康絢傳天監元年封南陽縣男頤煊案梁書本傳天監元年封南安縣男邑三百戶

長兼侍中

張纘傳累遷吏部郎俄而長兼侍中頤煊案梁書本傳作累遷

尙書吏部郎俄爲長史兼侍中史字是後人誤添見王儉傳錢氏考異

東平范人

呂僧珍傳東海范陽人也錢氏考異云梁書無陽字東海固不得有范陽縣而考之宋志范縣亦隸東平非東海也頤煊案汲古閣本梁書呂僧珍傳東平范人字尙不誤

三橋宅

范雲傳帝嘗與雲言及舊事云朕司州還在三橋宅頤煊案梁書武帝紀高祖以宋大明八年甲辰歲生于秣陵縣同夏里三橋宅周興嗣傳高祖以三橋舊宅爲光宅寺敕興嗣陸倕各製寺碑

冀州刺史徽

裴邃傳魏冀州刺史徽之後也頤煊案梁書本傳魏襄州刺史綽之後晉書裴楷傳父徽魏冀州刺史楷弟綽官至黃門侍郎長水校尉不言爲襄州刺史

卿年三十五

江淹傳建元二年始置史官淹與司徒左長史檀超共掌其任拜中書侍郎王儉嘗謂曰卿年三十五已爲中書侍郎頤煊案梁書本傳淹天監四年卒時年六十二淹年三十五當昇明二年在建元前矣前後年歲當有一誤

睢陵鄉人

陳伯之傳濟陰睢陽人也後隨鄉人車騎將軍王廣之頤煊案

梁書本傳作睢陵人南齊書州郡志睢陵縣屬濟陰郡王廣之沛郡相人同屬北徐州故稱鄉人

文藝

朱异傳天下唯有文義恭書卿一時將去頤煊案義當作藝卽上文所云異涉獵文史兼通雜藝博奕書算皆其所長是也

新安令

顧協傳正德爲巴西梓潼郡協除所部新安令頤煊案梁書本傳作除所部安都令

任約

王僧辨傳嗣徽密結南豫州刺史任約與僧辨故舊圖陳武帝度江戰敗嗣徽墜馬死任約得北歸頤煊案此與侯景大將任

約爲胡僧祐所擒者別是一人

### 韓擒

陳太子深傳隋將韓擒虎自南掖門入頤煊案魯廣達傳初隋將韓擒之濟江任忠傳隋將韓擒自新林進軍忠引擒軍共入南掖門此與後主本紀稱韓擒虎皆是後人妄加

### 拋車

黃法蕘傳出歷陽於是爲拋車及步檻豎拍以逼之砲加其樓堞尅之頤煊案陳書本傳拋車作拍車砲亦作拍三字皆通用

### 安成王

吳明徹傳遣安成王瑱代明徹頤煊案陳書宣帝紀諱瑱世祖嗣位改封安成王瑱當是瑱字之譌

韓子高

陳子高傳會稽山陰人也頤煊案陳書作韓子高南史目錄亦作韓子高此作陳字傳寫之譌

姚僧垣

姚察傳父僧垣梁太醫正後入周位遇甚重頤煊案垣當作垣周書姚僧垣在藝術傳隋書經籍志姚大夫集驗方十二卷舊唐志姚僧垣撰

郡祿

阮長之傳時郡田祿以芒種爲斷此前去官者則一年祿秩皆入後人頤煊案此文有脫誤宋書本傳作芒種爲斷此前去官者則一年秩祿皆入前人此後去官者則一年秩祿皆入後人

江陰郡

沈文阿傳陳武帝以文阿州里表爲原鄉令監江陰郡頤煊案  
隋書地理志毘陵郡江陰縣梁置及置江陰郡平陳廢郡陳書  
本傳作監江陵郡

詣領軍

邱靈鞠傳州辟從事詣領軍沈演之演之日身昔爲州職詣領  
軍謝晦賓主坐處政如今日卿將來復如此也頤煊案州職詣  
領軍常用下官禮此爲異數故特言之

高爽

卞彬傳時有廣陵高爽博學多材劉蒨爲晉陵縣爽經途詣之  
了不相接俄而爽代蒨爲縣蒨遣迎贈甚厚頤煊案梁書高爽



附見吳均傳出爲晉陽令坐事繫治晉陽當是晉陵之譌

顏延之在尋陽

陶潛傳先是顏延之爲劉柳後軍功曹在尋陽與潛情款頤煊案宋書顏延之傳後將軍吳國內史劉柳以爲行參軍因轉主簿後劉柳爲江州刺史其時延之當在尋陽

少文舊宅

宗測傳遂往廬山止祖少文舊宅頤煊案下文測送弟喪還西仍留舊宅永業寺南齊書本傳作遂往廬山止元武司宅當是其舊宅所居名異耳

樓惠明

關康之傳又有東陽樓惠明文惠太子在東宮苦延方至仍又

辭歸俄自金華輕棹西下及就路回之豐安旬日之間唐寓之  
祇賊入城塗地唯豐安獨全頤煊案南齊書徐伯珍傳樓惠明  
忽乘輕舟向臨安縣眾不知所以尋而唐寓之賊破郡與此不  
同

蔡閑

戴法興傳法興與戴明寶蔡賢俱轉參軍督護頤煊案賢當作  
閑宋書本傳作蔡閑下文大明二年以南下預密謀閑時已卒  
追加爵封宋書封閑高昌縣男食邑各三百戶

濟南太守

徐爰傳明帝崩還都以爰爲濟南太守頤煊案宋書本傳以爰  
爲南濟陰太守

臨淮王敬則

阮佃夫傳又語所領細鍙將臨淮王敬則頤煊案南齊書王敬則傳晉陵南沙人也領細鍙左右與壽寂之同斃景和或寓居在臨淮

潘妃

姑法珍傳帝所幸潘妃本姓俞名尼子王敬則妓也頤煊案王茂傳時東昏妃潘玉兒有國色武帝將畱之以問茂茂曰亡齊者此物畱之恐貽外議帝乃出之

諸史考異卷十六終

南海潘乃成初校番禺黃濤覆校

諸史考異卷十七

臨海洪頤煊撰

北史上

魏始祖

魏神元本紀神元皇帝諱力微頤煊案魏書本紀稱始祖神元皇帝

文帝如晉

五十六年文帝復如晉頤煊案晉書武帝紀咸寧元年六月鮮卑力微遣子來獻

劉琨子遵

穆帝本紀三年晉并州刺史劉琨遣子遵爲質乞師頤煊案魏

書作以子遵爲質晉書劉琨傳亦作子遵導字傳寫之譌

元年至九年

道武本紀元年葬昭成皇帝于金陵錢氏考異云自什翼健被執道武逃竄賀蘭部僅得存活代之無主者九年魏收於昭成歿後卽稱道武帝元年以至九年誕妄之甚北史不當仍之顧焯案道武六歲而昭成崩逃竄獨孤部賀蘭部九年而後返國事同夏少康非空籍可比錢氏之譏未爲得之

義陽公

天興五年五月姚興遣其弟義陽王平來侵平陽攻陷乾壁頤焯案魏書本紀作義陽公

武牢

明元本紀泰常八年司空奚斤既平兗豫還圍武牢頤煊案南史虎牢字不避北史俱改作武

閻氏薨

文成本紀興安元年十一月甲申皇妣閻氏薨錢氏考異云后妃傳少以才選入東宮有寵生文成皇帝而薨文成卽位追尊號謚是閻氏之薨在文成卽位以前紀書于卽位之後自相矛盾頤煊案魏書恭皇后傳真君元年六月生高宗世祖末年薨卽興安元年十一月本與紀合北史刪去其薨年遂致抵牾

什寅

獻文本紀皇興四年二月詔征西大將軍上黨王長孫觀討吐谷渾什寅頤煊案魏書本紀作拾寅

鄭義

孝文本紀太和二年十月詔員外散騎常侍鄭發使於宋注發  
一作義頤煊案魏書本紀作鄭義鄭義傳孝文初兼員外散騎  
常侍宣朔將軍陽武子使於宋則作鄭發者誤也

破六韓

孝明本紀正光五年三月沃野鎮人破六韓拔陵反聚眾殺鎮  
將頤煊案魏書本紀作破落汗拔陵北齊書破六韓常傳右谷  
蠡王潘六奚沒斤魏其子孫以潘六奚爲氏後人訛誤以爲破  
六韓周書于謹傳作破六汗拔陵

万俟醜奴

孝莊本紀永安元年七月高平鎮人萬俟醜奴僭稱大位頤煊



案魏書本紀作万俟醜奴萬字是妄人所改已見北齊書万俟  
普傳

侯深

三年九月遣武衛將軍奚毅前燕州刺史侯深率眾鎮北中頤  
煇案魏書本紀作前燕州刺史崔淵

李賢

孝武本紀永熙三年七月略陽公宇文泰遣都督駱超李賢和  
各領數百騎赴洛超先至甲戌賢和會帝於嶠中頤煇案周書  
作遣大都督李賢將精兵一千赴洛陽賢字賢和

卽位改元

恭帝本紀廢帝三年正月卽皇帝位改元頤煇案廢帝立三年

爲宇文泰所廢恭帝立三年遜位於周閔帝皆未改元建號此  
改元二字當是後人所加

矛鈔

孝靜本紀天平元年十二月詔內外戒嚴百司悉依舊章從容  
雅服不得以務衫從事頤煊案魏書本紀作不得以矛鈔從事  
梁人來聘

四年七月甲辰遣兼散騎常侍李楷聘於梁十二月甲寅梁人  
來聘頤煊案魏書本紀此後魏聘於梁皆書使于蕭衍梁來聘  
皆書蕭衍遣使朝貢史臣夸飾之詞言之顏孔厚矣

鄉郡長公主

齊神武本紀路逢爾朱榮妻鄉郡長公主自洛陽來頤煊案北

齊書本紀作北鄉長公主誤魏孝莊紀亦作榮妻鄉郡長公主

年號神嘉

天平元年初孝昌中山胡劉彥升自稱天子年號神嘉頤煊案  
孝明本紀孝昌元年十二月山胡劉彥升反自稱天子失載其  
年號

八月壬辰

文襄本紀武定五年八月壬辰頤煊案此下俱與北齊書文襄  
紀異北齊書此紀本闕後人雜采他書以補之故不同

賀拔仁

文宣本紀天保元年六月又詔封功臣并州刺史賀拔仁爲安  
定王頤煊案神武本紀兆徵神武神武將往賀拔焉過兒請緩

言行弊之又神武謂世子曰賀拔焉過兒樸實無罪過焉過兒當卽仁之小字

廟號不同

乾明元年二月景申葬於武寧陵謚曰文宣帝廟號顯祖天統初有詔改謚景烈廟號威宗武平初又奏復帝本謚廟號顯祖頤煊案孝昭皇建元年十一月癸丑有司奏高祖文宣皇帝廟宜奏文正之樂舞光大之舞庚申詔以故太尉河東王潘相樂三人配饗高祖廟庭天統元年十二月庚午有司奏改高祖文宣皇帝爲威宗景烈皇帝皇建元年卽乾明元年當是二月景申初葬廟號顯祖九月壬申議定三祖改號高祖故前後廟號不同

策試秀孝

武成本紀河清二年正月乙亥帝詔臨朝堂策試秀孝頤煊案  
魏書靈太后傳又親策孝秀州郡計吏於朝堂邢巒傳有司奏  
策秀孝北齊書本紀作策試秀才非

衛可瓌

周文帝本紀正光末沃野鎮人破六韓拔陵作亂其僞署王衛  
可瓌頤煊案瓌當作瓌周書本紀作衛可孤北齊書賀拔允傳  
作衛可肱皆聲相近

兄子遵

四月引兵上隴雷兄子遵爲都督鎮原州頤煊案周書本紀作  
雷兄子導大統四年華州刺史宇文導襲咸陽與帝會攻破青

雀卽兄子導也宗室傳邵惠公顥子導

高慎

大統九年二月東魏北豫州刺史高慎舉州來附頤煊案周書本紀作高仲密慎字仲密見北齊書高乾傳

長子覺

十四年春魏帝詔封帝長子覺爲寧都郡公頤煊案周書本紀作詔封太祖長子毓爲寧都郡公孝閔帝紀諱覺文帝第三子明帝紀諱毓文帝長子大統十四年封寧都郡公此紀作長子覺者誤也

帝不愈

宣帝本紀大象二年五月乙未帝不愈頤煊案愈當作念與豫

字通用

襄武縣公

隋文帝本紀從禽寶泰破沙苑陣封襄武縣公  
頤煊案周書楊忠傳作進爵襄城縣公

永富郡公

周皇元年十一月乙卯以永富郡公竇榮定爲右武侯大將軍  
頤煊案隋書本紀作永昌郡公竇榮定傳襲爵永富縣公

熒惑入太微

煬帝本紀大業元年甲子熒惑入太微  
頤煊案甲子上脫六月二字

給復三年

五年六月戊午大赦隴右諸郡給復二年頤煊案隋書本紀作隴右諸郡給復一年行經之所給復二年

保母乳母

明元密皇后杜氏傳先是太武保母竇氏初以夫家坐事誅與二女俱入宮明元命爲太武保母及卽位尊爲皇太后頤煊案又文成乳母常氏本遼西人因事入宮乳帝文成卽位尊爲保太后尋尊爲皇太后告於郊廟蓋其時制如此

樂安公主

孝文文昭皇后高氏傳後生宣武及廣平王懷樂安公主頤煊案魏書本傳作長樂公主

蠕蠕公主



齊武明皇后婁氏傳神武逼於蠕蠕欲娶其女及茹茹公主至  
后避正室處之頤煊案茹茹卽蠕蠕下傳云蠕蠕公主者蠕蠕  
主郗久閭阿那瓌女也武定三年使慕容儼往聘之號曰蠕蠕  
公主此稱茹茹公主亦史之駁文

宣帝后陳氏

周宣帝后陳氏傳大象元年六月以選入宮帝崩出俗爲尼改  
名華光后永徽初終頤煊案自周大象元年下距唐高宗永徽  
元年凡七十二年元皇后傳年十五被選入宮與陳皇后同時  
年齒復同二后貞觀時尚存

孝武

魏常山王遵傳弟順字敬叔從孝武入關封濮陽王及武帝

崩祕未發喪。隨煊案武帝卽孝武也。下文又云初孝武在洛一傳之中名稱前後互異。

庾信贈詩

順子偉字大猷。大統十六年封南安郡王。改淮南縣公。初自鄴還。庾信贈其詩曰。梁亡垂棘反。齊平寶鼎歸。隨煊案。今庾信集贈司空淮南公詩。毓亡垂棘返。齊平寶鼎歸。

高諒

陽平王暉傳。孝昌元年。法僧殺行臺高諒。反於彭城。隨煊案。魏書本傳作殺行臺高謨。

元善

京兆王黎傳。又字伯儁。累加侍中。領軍將軍。賜死於家。又子舒。

祕書郎又死後亡奔梁官至征北大將軍青冀二州刺史子善亦名善住少隨父至江南侯景之亂善歸周武帝甚禮之賜爵江陽縣公又弟羅字仲綱頤煊案書元善傳祖又魏侍中父羅初爲梁州刺史及又被誅奔於梁官至征北大將軍青冀二州刺史以元善爲元羅之子元羅爲元乂之子而以元舒官位爲元羅傳皆與此不同當是隋史之誤

臨淮王

臨淮王譚傳彘弟孝友襲爵淮陽王頤煊案淮陽當作臨淮魏書本傳非齊書元孝友傳俱作臨淮王

高聰

廣川王略傳詔曰古者大臣之喪有三臨之禮黃門侍郎崔光

宋弁通直常侍劉芳典命下大夫李元凱中書侍郎高勳等議  
頤煊案魏書本傳作中書侍郎高敏

賜如意

廣陵王羽傳詔羽從至應門及令羽歸望其稱效故賜如意以  
表心頤煊案賜如意之禮已見於此

彭城王

彭城王勰傳嫡子邵字子訥襲封錢氏考異云勰第三子子攸  
封長樂王卽孝莊帝也子攸弟子正封始平王於河陰遇害又  
孝莊兄子小字伽利封陳畱王傳皆失書頤煊案彭城諸子北  
史所載不及魏書本傳之詳邵有二子韶字世胃襲字世紹武  
定初封武安王劭兄子直字方言劭稱嫡子子直當是庶長兄

子直封真定縣公孝莊踐阼追封陳畱王三子寬字思猛襲王爵剛字金明莊帝初封浮陽王質林慮王劭弟子正肅宗初封霸城縣公莊帝卽位封始平王與兄劭俱遇害伽利當卽子直子寬小字也

### 東海王瑱

北海王詳傳瑱弟瑱莊帝初封東海王頤煊案魏書本傳作瑱弟瑱孝莊紀中軍將軍給事黃門侍郎元瑱爲東海王

### 兩譏

穆崇傳時河南尹李獎往詣紹獎以紹郡人謂必致敬紹又恃封邑是獎國主匡坐待之不爲動膝獎憚其位望致拜而還譏者兩譏焉頤煊案宋書劉凝之傳臨川王義慶衡陽王義季鎮

江陵並遣使存問凝之荅書曰頓首稱僕不修民禮人或譏焉  
劉穆之傳先是郡縣爲封國若自吏相並於國主稱臣去任便  
止至世祖孝建中始革此制爲下官致敬故議者兩譏焉

苻氏

庾業延傳昭成崩苻氏內侮頤煊案魏書本傳苻氏作氏寇

次中山

崔宏傳仕慕容垂爲高陽內史道武征慕容寶次中山棄郡走  
海濱頤煊案魏書本傳太祖征慕容寶次於常山元伯棄郡東  
走海濱道武紀皇始元年十一月庚子朔帝至眞定自常山以  
東守宰或捐城奔竄或稽顙軍門戊午進軍中山

鉤已

崔浩傳往年以來熒惑再守羽林越鉤陳其占秦亡頤煊案魏書本傳作再守羽林皆成鉤已史記正義引天官占云熒惑環繞句曲芒角動搖乍前乍後其殃逾甚已字形屈曲鉤已卽鉤曲也後人不知鉤已字義妄改作越鉤陳其誤甚矣

趙淮

長孫肥傳時中山太守仇儒亡國匿趙郡推趙淮爲王頤煊案魏書本傳作趙淮妄造妖言云燕東傾趙當續欲知其名淮水不足字當作淮

孫伏連

于栗磾傳王顯欲逞奸計與中常侍給事中孫蓮等厲色不聽孫蓮等密欲矯太后令以高肇錄尚書事頤煊案魏書本傳作

給事中孫伏連

巨彌也列河

于謹傳字思敬小名巨引頤煊案周書本傳作小名巨彌於是西部也列河等三萬餘戶並款附本傳作也列河

天下盛門

崔悛傳每謂盧元明日天下盛門唯我與尔博崔趙李何事者哉崔暹聞而銜之頤煊案魏書崔暹傳本云清河東武城人也世家於滎陽潁川之間北齊書崔暹傳博陵安平人

匿於長樂

宋隱傳被徵乃棄妻子匿於長樂數年而卒臨終謂其子經曰云云頤煊案魏書本傳作後匿於長樂之經縣數年而卒臨終



謂其子姪等曰與此不同

### 韓子連珠

李先博俄而召先讀韓子連珠論二十二篇太公兵法十一事  
附錄案魏書本傳連珠下無論字今韓子五十五篇無連珠名  
固安侯

盧元傳後賜爵固安子卒贈平東將軍固安侯頤煊案魏書本  
傳俱不載高允傳作固安伯

### 幽州

盧昌衡傳孝徵每日吾用盧子均爲尙書郎自謂無愧幽明頤  
煊案隋書本傳作自謂無愧幽州矣昌衡祖盧淵卒於祕書監  
贈幽州刺史父道虔天平中歷幽州刺史猶言無愧於其祖父

此改作無愧幽明非是

叔虎

盧觀傳觀弟仲宣仲宣弟叔彪頤煊案魏書本傳仲宣弟叔虔武定初司徒諮議參軍虔當是虎字之譌北史避唐諱改作叔彪北齊書避唐諱改作叔武皆其證

南潁川太守

高允傳初允所引劉模者長樂信都人太和中除南潁川太守頤煊案魏書本傳作出除潁州刺史誤模遂家於南潁川不復歸其舊鄉

名字不同

崔辯傳士元弟士謙孝昌初解褐著作佐郎孝武西遷拜尙書

左丞荊州刺史與弟說特相友愛說本名士約累遷都官尚書  
總管涼州刺史頤煊案魏書本傳士元弟上謙上約並歿關西  
士謙周書列傳作崔謙說周書作說字形相近

爲羣拜紀

崔孝芬傳比見賢子謁帝旨喻殊優合當爲絕羣耳頤煊案魏  
書本傳作今當爲羣拜紀今汲古閣本北史是妄人所改

趙郡睦仲讓

崔暹傳命達拏高坐開講同郡睦仲讓陽屈服之頤煊案北齊  
書本傳作趙郡睦仲讓睦豫傳趙郡高邑人宗人仲讓天保時  
尚書左丞則作同郡者非是

光青兗三州

鄭道昭傳歷光青二州刺史頤煊案魏書本傳作出爲光州刺史轉青州刺史地形志光州治掖城皇興四年分青州置晉書地理志慕容超移青州於東萊郡光青二州本同在一城子述祖傳歷兗州刺史遷光州刺史初述祖父爲兗州於城南小山起齋亭刻石爲記述祖時年九歲及爲刺史往尋舊迹得一破石有銘云中岳先生鄭道昭之白雲堂其時兗州亦當寄治在掖故或稱光州或稱兗州明是一城錢氏疑兗爲光字之譌非是

番州

薛道衡傳煬帝嗣位轉潘州刺史頤煊案房彥謙傳煬帝嗣位道衡轉牧番州隋書地理志南海郡仁壽元年置番州

諸史考異卷十七終

南海潘乃成初校番禺黃濤覆校

諸史考異卷十八

臨海洪頤煊撰

北史下

東清河

房法壽傳清河東武城人也曾祖謚隨慕容氏遷於齊子孫因家之遂爲東清河釋幕人焉頤煊案魏書本傳清河釋幕人脫東字

許赤虎

甄琛傳遂從許赤彪假書研習頤煊案魏書本傳作許叡李彪是後人所改許彥傳又有博陵許赤虎涉獵經史善嘲謔延興中著作佐郎北史避唐諱改許赤彪

東吳

邢邵傳其高情達識開遣滯累東門吳以還所未有也頤煊案北齊書本傳作東吳以還無門字句不可解當有脫誤

宣武

崔鴻傳雖明旨已行猶宜消息武帝不從頤煊案武帝當作宣武

妹夫

劉藻傳永安中與妹夫李疑俱來歸魏頤煊案魏書本傳作姊夫李疑

魯康祖

傅永傳齊將魯康祖趙公侵豫州之大倉口頤煊案魏書本傳

作魯康祚下文同

磐陽

傅暨眼傳本清河人也祖父融南徙渡河家於磐陽頤煊案地形志東清河郡治磐陽城

臣卿乃少

孫紹傳紹曰臣年雖老臣卿乃少頤煊案紹時爲太府少卿故云然魏書本傳作臣節乃少非是

幽州

祖瑩傳昔流共工於幽州北裔之地那忽有此子也頤煊案孟子作幽州尙書作幽洲孔氏正義云流徙共工於北裔之幽州與此本同幽洲字亦當寫幽州



足一名敦

斛斯椿傳云父足一名敦時椿父足先在秀容忽有傳其死問椿請減已階以贈之頤煊案魏書本傳足一名敦皆作敦

高崇之

高恭之傳父崇字積善除洛陽令爲政清斷頤煊案魏書本傳亦作高崇子謙之傳臣亡父先臣崇之爲洛陽當得人奏是非崇下有之字

游娘

齊趙郡王叡傳養於宮中令游娘母之其母魏華山公主也頤煊案后妃傳序齊神武文襄俱未踐尊極兩宮自餘姬侍並稱娘而已高陽太妃游氏傳有馮娘李娘王娘穆娘北齊書本傳

其母則魏華陽公主以下文證之山字誤也

清河王岳

清河王岳傳使高歸彥就宅賜以鳩岳曰臣無罪彥曰飲之飲而薨時年三十四皇建中配享文宣廟庭頤煊案北齊書本傳作六年十一月使高歸彥就宅切責之岳憂悸不知所爲數日而薨故時論紛然以爲賜鳩也時年四十四皇建中配享世宗廟庭皆與此不同

見太后

琅邪王儼傳出儼居北宮五日一朝不復得無時見太后頤煊案北齊書本傳作不得每日見太后

獨孤如願

莫多婁貨文傳與行臺侯景攻獨孤信於金墉城頤煊案北齊書本傳作獨孤如願周書獨孤信傳本名如願

高隆之

高隆之傳文宣末年多猜害追忿隆之執其子司徒中兵慧登等二十人於前慧登言乞命帝曰不得已以鞭扣鞍一時頭絕並投之漳水頤煊案北齊書本傳作追忿隆之誅其子德樞等十餘人並投漳水

卿

斛律光傳祖信少年時父遜爲李庶所卿因請庶謂庶曰暫來見卿還辭卿去庶父諧杖庶而謝焉頤煊案南齊書陸慧曉傳未嘗卿士大夫或問其故慧曉曰貴人不可卿而賤者可卿

贊物

陳元康傳子善藏嗣大業初卒於彭城郡贊務隋書本傳作贊治皆北史避高宗名改作務

曲陽

杜弼傳中山曲陽人也頤煊案魏書地形志中山郡上曲陽隋書地理志恆陽舊曰上曲陽後齊去上字杜臺卿傳博陵曲陽人其時中山已併入博陵郡

胡皇后妹

馮子琮傳子琮妻胡皇后姊也頤煊案北齊書本傳作胡皇后妹以下文太后妹夫之言證之此姊字誤

幽國公

周章武郡公導傳贈尚書令諡曰孝天和五年重贈太師柱國公頤煊案周書本傳作重贈太師柱國幽國公此省幽國二字非是

恆爲同州

中山公護傳出植爲梁州恆爲同州欲遏其謀頤煊案周書晉蕩公護傳恆爲潼州刺史

賜姓

寇洛傳明帝二年賜和姓若引氏頤煊案周書本傳作若口引氏魏書官氏志若口引氏後改爲寇氏此若下脫口字

庫狄樂

李賢傳拜賢孫庫狄樂爲儀同頤煊案周書本傳作賢甥庫狄

樂

次子暉

李弼傳子曜居長以次子暉尙文帝女義安長公主故遂以爲嗣頤煊案周書本傳作子輝次子耀尙太祖女義安長公主遂以爲嗣輝誤乙非是

可頻氏

王雄傳恭帝元年賜姓可頻氏頤煊案周書本傳亦作賜姓可頻氏北齊書斛律光傳河清三年周文帝遣庸國公可叱雄等寇洛陽北史作庸公王雄

封邑不同

獨狐信傳第三子穆必要縣侯第五子順武成縣侯頤煊案周

本傳穆文侯縣侯順項城縣伯

柱國泰

蘇綽傳乃命綽爲大誥其詞曰惟十有一年仲夏庶邦百辟咸會於王庭柱國泰洎羣公列將罔不來朝頤煊案周書本傳作柱國虎洎羣公列將其時魏帝祭廟因作大誥羣臣自當以周文爲首當時周受禪後史臣改作李虎非實錄也

華山郡

韋孝寬傳拜國子博士行華山郡事頤煊案周書本傳作華陰郡事魏書地形志華州華山郡第一縣華陰未嘗置郡

子孝僊

王傑傳追封鄂國公諡曰威子孝遷位開府儀同大將軍頤煊

案周書本傳作子孝僊遷卽僊字之譌隋龍藏寺碑太師上柱國大威公之世子金城王孝僊僊又僊字之別體

子城

劉雄傳臨洮子城人也錢氏考異云魏志臨洮郡無子城縣頤煊案隋書地理志金城郡金城縣舊縣日子城狄道縣後魏置臨洮郡其時子城當屬焉

令狐邁

令狐整傳整遠祖漢建威將軍邁不爲王莽屈其子稱避地河右頤煊案元和姓纂令狐氏周文王子畢公高之後漢有令狐邁避王莽亂敦煌生稱稱八代孫整周御正中大夫生熙隋吏部尙書



豆盧氏

豆盧寧傳高祖勝以燕皇始初歸魏賜姓豆盧氏或云北人謂歸義爲豆盧因氏焉又云避難改焉未詳孰是頤煊案周書本傳作或云避難改焉隋書豆盧勣傳作北人謂歸義爲豆盧因氏焉

叱利氏

楊紹傳賜姓叱呂引氏頤煊案隋書觀德王傳亦作叱呂引氏周書本傳作賜姓叱利氏

韓擒虎

韓禽傳頤煊案隋書本傳作韓擒周易師卦田有禽釋文云徐本作擒禽擒古字本通用禽本名擒虎史臣避唐諱皆闕虎字

青驄馬

先是江東謠曰黃班青驄馬發自壽陽浹頤煊案隋書本傳作青驄馬禽本名禽武本傳作擒本名豹皆避諱改

令狐延

申徽傳瓜州刺史成慶爲城人張保所殺都督令狐延等起義逐保頤煊案事見令狐整傳整本名延

賜姓

陸通傳賜姓部六孤氏頤煊案部當作步六孤氏魏書官氏志步六孤氏後改爲陸氏此是賜復其本姓

邵州

楊樹傳又於邵郡置邵州以樹爲刺史頤煊案魏書地形志邵

郡屬東雍州時東魏以正平爲東雍州遣薛榮祖鎮之周因於  
邵郡置邵州以擢爲刺史隋書地理志絳郡垣縣後魏置邵郡  
後周置邵州開皇初郡廢大業初州廢

投杼

隋房陵王勇傳每恐讒譖出於杼軸鳩毒遇於盃杓頤煊案隋  
書本傳作讒譖生於投杼淺人見與下句盃杓對改作杼軸非  
是

邗國公楊惠

高頴傳隋文帝得政意欲引之入府遣邗公楊惠諭意頤煊案  
李德林傳邗國公楊惠滕穆王瓚傳一名慧進位上柱國邵國  
公周書楊忠傳慧作惠

懷州刺史

李德林傳因出爲湖州刺史在州逢旱課人掘井溉田爲考司所貶頤煊案隋書本傳因出爲湖州刺史轉懷州刺史在州逢亢旱課氏掘井溉田此剛轉懷州刺史非是

東梁州

劉昉傳父孟良從武帝入關爲梁州刺史頤煊案隋書本傳作東梁州刺史

李雄

李雄傳渤海裔人也頤煊案隋書李雄傳字昆盧趙郡高邑人與此別是一人

子總管

來護兒傳高智慧據江南及以子總管統兵隨楊素討之頤煊案達奚長儒傳授子都督數有戰功名皆不見於百官志

鎮江都

張齋傳賀若弼之鎮江都也特敕齋從因爲間諜平陳之役頗有力焉頤煊案隋書本傳作鎮壽春賀若弼傳拜吳州總管委以平陳事弼忻然以爲己任與壽州總管源雄並爲重鎮地理志江都郡後周改爲吳州壽春則壽州治所也

將作少監

字文化及傳煬帝追憶之起化及爲右屯衛將軍將作少監頤煊案隋書本傳作起化及爲右屯衛將軍智及爲將作少監史脫三字

廣靈

賀訥傳訥總攝東部爲大人遷居大靈頤煊案大靈卽廣靈隋時避諱改

論語孝經

陳奇傳乃取奇注論語孝經燒於庭內奇曰公貴人不乏樵薪何乃然奇論語頤煊案奇注論語孝經當是寫於竹簡故云然

皋魚

劉獻之傳見旱魚之歎方乃歸而養親頤煊案旱當作皋

講書

徐遵明傳是後敎授門徒每臨講坐先持執疏然後敷講學徒至今浸以成俗頤煊案魏書祖瑩傳時中書博士張天龍講尙

書選爲都講生徒悉集瑩夜讀書勞倦不覺天曉催講既切遂  
誤持同房生趙郡李孝怡曲禮卷上座博士嚴毅不敢還取乃  
置禮於前誦尙書三篇不遺一字張吾貴傳曾在夏學聚徒千  
數而不講傳生徒竊云張生之於左氏似不能說吾貴聞之謂  
其徒曰我今夏講暫罷後當說傳君等來日皆當持本生徒怪  
之而已吾貴詣劉蘭蘭遂爲講傳三句之中吾貴兼讀服杜隱  
括兩家異同悉舉諸生後集便爲講之義例無窮皆多新異蘭  
仍伏聽學者以此益奇之

張黑奴

熊安生傳常受其業擅名於後者有馬榮伯張黑奴竇士榮孔  
籠頤煊案張黑奴卽張買奴馬光傳字榮伯開皇初徵光與張

仲讓孔籠竇仕榮張買奴隋書馬光傳作張黑奴

南昌縣侯

王褒傳襲爵南昌縣侯頤煊案周書本傳曾祖儉齊侍中太尉  
南昌文憲公祖騫梁侍中南昌安侯父規梁侍中南昌文憲章  
侯南史王儉傳襲爵豫寧縣侯儉爲王曇首孫曇首本封豫章  
縣侯因縣改名故稱豫寧南齊書州郡志縣又改名南昌故褒  
所襲稱南昌縣侯餘見宋書王曇首傳

王軌

顏之儀傳及帝殺元軌之儀固諫帝怒欲并致之於法頤煊案  
元軌當作王軌周書王軌傳帝令內史杜慶信就徐州殺軌御  
正中大夫顏儀切諫帝不納王軌亦稱烏丸軌



草馬

許善心傳賜草馬二十四匹頤煊案草馬卽牝馬已見魏書蠕蠕傳隋書本傳改作阜馬非是當從宋本

陽洛

寶瑗傳遼西陽洛人也頤煊案魏書本傳作遼西遼陽人地形志遼西郡無遼陽縣陽洛作陽樂古字通用

冀州繹幕縣

蘇瓊傳冀州繹幕縣人成氏頤煊案地形志繹幕縣一在安德郡屬冀州一在東清河郡屬齊州故此稱冀州以別之

騎虎

庾季才傳吾今譬騎虎誠不得下矣頤煊案虎字是後人所改

靈臺祕苑

撰靈臺祕苑一百二十卷垂象志一百四十二卷頤煊案隋書  
經籍志垂象志一百四十八卷靈臺祕苑一百一十五卷卷數  
與此不同

象州逆帥

何稠傳象州逆州開府梁暉討叛夷羅壽頤煊案此節文多舛  
錯隋書本傳象州逆帥杜條遼羅州逆帥龐靖等相繼降款分  
遣建州開府梁暉討叛夷羅壽羅州刺史馮暄討賊帥李大檀  
並平之

淮陽上黨

如皓傳遂寓居淮陽上黨爲縣金曹史南徐州刺史沈陵見而

喜之頤煊案其時上黨縣寄治淮陽郡見魏書尉元傳

劉虎

鐵弗劉武傳南單于苗裔居於新興虜意之間頤煊案魏書本傳作劉虎避唐諱改作武虜意當作慮虜傳寫之譌

大沮渠

大沮渠蒙遜傳匈奴有左沮渠官蒙遜之先爲此職羌之首豪曰大故以官爲氏以大冠之頤煊案魏書本傳晉書載記皆作沮渠蒙遜無大字

若洛廐

吐谷渾傳本遼東鮮卑徒河涉歸子也涉歸一名奕洛韓有二子庶長曰吐谷渾少曰若洛廐涉歸死若洛廐代統部落是爲

慕容氏頤煊案徒河慕容廆傳字奕洛瓌皆聲相近

時羅漫山

突厥傳處羅大敗棄妻子將數千騎東走遁於高昌東保時羅漫山高昌王麴伯雅上狀頤煊案唐姜行本紀功碑以貞觀十四年五月十日師次伊吾時漫羅山元和郡縣志時漫羅山匈奴謂之天山在伊州北一百二十里

李廣三子

序傳廣子當戶椒敢當戶子陵戰歿匈奴椒敢歷侍中郎中令關內侯生子禹位至侍中並事具漢史頤煊案新唐書世系表廣二子長曰當戶生陵字少卿騎都尉次曰敢字幼卿郎中令關內侯生禹字子通而無椒字史記漢書李廣傳並云廣三子

言五卷第一  
三  
日當尸椒敢皆爲郎中當尸蚤死乃拜椒爲代郡太守敢以校尉從票騎將軍擊胡賜爵關內侯代廣爲郎中令敢男禹有寵於太子廣三子當以史漢之言爲正

諸史考異卷十八終

南海潘乃成初校番禺黃濤覆校